

PIRIP

Jesus hã h'yy ka'eeh do Pirip häd näng do panang
bã habong do hã Paw-Ro ma erih do hahÿÿh

Kedëng do ky n'aa hahÿÿh

1 ÿ Paw-Ro, Tsimoot daheeh, Kristo Jesus karom hedoo do ããh, ãã edëng bë sahõnh hẽ, tsyt hẽ P'op Hagã Do wẽ kasëew bong doo, Kristo Jesus hã h'yy kata padëek doo, panang Pirip häd näng doo bã haj'eenh doo. Jesus hã h'yy ka'eeh do sa wahë n'aa, sa wahë n'aa masa n'aa tii bã haj'eenh do ãã edëng na-ããj hẽ.

²ÿ karën P'op Hagã Do er Yb, Jesus Kristo Tak'ëp Hyb N'aa Jawyk Do na-ããj hẽ ky en'yyim bë hã. ÿ karën baad ub Kristo bë rah'yyb en'yyim.

Jesus hã h'yy ka'eeh do sa hyb n'aa Paw-Ro

ky n'aa etsëe do ky n'aa hahÿÿh

³P'op Hagã Doo, ÿ h'yy kaha'eeh do wẽ ÿ h'yy gadajang bë ÿ hyb n'aa hesé bã. ⁴Bë ÿ ky n'aa ets'ëe bã, h'yy gadajaa gó had'yyt hẽ ÿ ky n'aa etsëe bë sahõnh hẽ, ⁵bë du doo noo gó naa Jesus hã bë h'yy ka'eeh do ÿ bë masa do hyb n'aa Kristo panyyg hanãm do ÿ maher'oot hyb n'aa. ⁶Baad ÿ bahapãh hahÿÿh: Bë h'yyb gó baad hadoo do P'op Hagã Do du doo doo, kaja däk da tan'oo bã Jesus Kristo matëeh bã kä. ⁷Taw'ãäts hẽ né hẽ tii da ÿ hyb n'aa newëe sahõnh hẽ bë wẽ, bë ÿ kamahãh do hyb n'aa tak'ëp. Bë sahõnh hẽ ÿ bë masa ÿ moo wät do hã, taky enyym doo gó hã ÿ P'op Hagã Do an'oo däk do hã. ÿ bë masa ragadahew'ëes doo gó ÿ bagëet bã. ÿ bë masa na-ããj hẽ, hyb n'aa jew'yyk do sa matym gó ÿ ag'ëed bã Jesus panyyg hanãm do ÿ mo n'aa jesuu hyb n'aa, te hub né hẽ ÿ metëeh hyb n'aa sa hã. ⁸Tak'ëp paawã ÿ karën bë ÿ bahapãh, Kristo Jesus ji kamahãh doo da bë ÿ kamahãh do hyb n'aa. Né hup ÿ né hẽ ti ÿ her'oot do P'op Hagã Do hapãh.

⁹P'op Hagã Do hã bë ÿ ky n'aa etsëe, bë kamahãh do takah'üüm hyb n'aa. Bë ÿ ky n'aa etsëe, bë tah'yy gan'yyh hyb n'aa. Bë ÿ ky n'aa etsëe, bë bahapãh hyb n'aa ny hadoo do baad ub, ny hadoo do baad nadoo doo. ¹⁰Tii d' ÿ wén ky n'aa etsëe, baad had'op do bë bahapãh hyb n'aa, baad had'op bë babok hyb n'aa na-ããj hẽ Kristo matëeh bã kä. ÿ karën dooh bë hã raw'yyt pé bë hã raky n'aa tapaa pé bë babok do hã Kristo matëeh bã kä. ¹¹Tii d' ÿ wén

ky n'aa etsēē na-āāj hē, baad had'op tabahadoo hyb n'aa had'yyt hē sahōnh hē bē bad'oo doo, P'op Hagä Do hā sahōnh hē raj'aa etsē hyb n'aa, P'op Hagä Do kawehēē dāk hyb n'aa na-āāj hē baad hadoo do bē hā rabahapäh bä. Jesus Kristo hanaa né hē ta ti baad ji awät do had'yyt doo.

Jesus ky n'aa kah'ũüm do ky n'aa hahÿÿh

¹²Hÿÿ kã wakãh haa hedoo doo, ÿ karēn bē bahapäh hahÿÿh: Baad nadoo do wē ÿ kajaa doo, dooh tahewad bä Jesus ky n'aa hanãm doo. Baad nadoo do wē ÿ kajaa doo, Jesus ky n'aa hanãm do jé pad'yyt hē takah'ũüm tan'oo bä. ¹³Sahōnh hē warahén Roma buuj sa wahē n'aa tób haeh do hag'ãas doo, panang buuj na-āāj hē, rabahapēē däg kãn Kristo hyb n'aa ti ÿ radawäts gēēt. ¹⁴Ragadahew'ēēs doo gó ÿ bagēēt do hyb n'aa hajök er hÿÿj hedoo do babä habong do rah'yyb hedo padēek, Tak'öp Hyb N'aa Jawyk Do hā rah'yy kasadēē padēek, neÿÿm doo gó rawén her'ood hōm hÿÿ kã P'op Hagä Do ky n'aa.

¹⁵Sa wób rabaher'oot Kristo ky n'aa rahyb n'aa jewēs do hyb n'aa ÿÿh, bahãnh ÿÿ rakarēn ranu gapad'ēek do hyb n'aa na-āāj hē. Ta wób rabaher'oot Kristo ky n'aa ÿ ramasa rakarēn do hyb n'aa, ta ky n'aa takah'ũüm hyb n'aa. ¹⁶Tii d' rawén d'oo ÿ rakamahãh do hyb n'aa. ÿ radawäts gēēt P'op Hagä Do an'oo bä rabahapäh, Kristo ky n'aa hanãm do ÿ mo n'aa jesuu hyb n'aa, te hub né hē ÿ metēeh hyb n'aa ta wób sa hā. Ta ti rabahapäh do hyb n'aa ÿ ramasa. ¹⁷Ta wób rawén her'oot Kristo ky n'aa, bahãnh ÿÿ ranu gapad'ēek rakarēn do hyb n'aa. Baad hadoo do hyb n'aa nado sa h'yyb Kristo ky n'aa rabaher'oot doo. Tii da rawén d'oo rakarēn né paawä baad nadoo do ÿ bahob magyys hē ragadahew'ēēs doo gó. ¹⁸Na manä ti ta tii. Sa h'yyb baad nadoo doo me rer'ood bä, sa h'yyb baad hadoo doo me ta wób rer'ood bä, taw'ãäts hē Kristo ky n'aa takaher'ood hōm. Kristo ky n'aa takaher'ood hōm do hyb n'aa ÿ h'yy gadajang, sa h'yyb baad nadoo doo me ta wób rabaher'ood né paawä.

ÿ d' h'yy gadajaa had'yyt hē, ¹⁹baad nadoo do babä ÿ ahoop do takawareem däg da baad hadoo do hā ÿ bahapäh do hyb n'aa. ÿ da reréd hōm baad ÿ bahōm hyb n'aa. Tii d' tawén hadoo P'op Hagä Do hā ÿ bē ky n'aa etsēē do hyb n'aa, P'op Hagä Do Sahee Jesus Kristo hā hana do ÿ tamasa do hyb n'aa na-āāj hē. ²⁰Baad hēp ÿÿ gó ÿ gada, dooh ÿ her'oot pé P'op Hagä Do matym gó ÿ

nu mebyy wät doo. Neỹỹm doo gó ỹ karēn paawā ỹ her'oot hyb n'aa jewyk do sa matym gó, Kristo hyb n'aa ỹ raky n'aa ety bä. Ỹ karēn Kristo kawehēē däg had'yyt hē hēp ỹ n'aa, ỹ bedēp do hā, ỹ radajēēb bä na-āāj hē. ²¹Tii d' ỹ wén her'oot, Kristo ỹ weh'ēēh hyb n'aa ỹ wén wät. Ỹ dajēb bä, ta bahānh baad ub ti hā ỹỹ, Kristo wē ỹ bawät hyb n'aa tii bä kä. ²²Badäk hahỹỹ bä ỹ bawät nä bä, ỹ ma panäk nä, ỹ ma metēēk nä Kristo ky n'aa. Ỹ haja bä paawā ỹ asēēw bä ỹ bad'oo doo, dooh ỹ hapēē bä ny hadoo do ỹ karēn: Badäk hahỹỹ hā ỹ awäd had'yyt doo, ỹ dajēp doo. ²³Pawóp hadoo do baad ub hā ỹỹ! Ỹ karēn paawā ỹ dajēp, Kristo pa ỹ bawät hyb n'aa. Ti ti baad had'op do hā ỹỹ. ²⁴Ti hadoo né hē, baad tabahadoo hyb n'aa bē hā, taw'āāts hē badäk hahỹỹ bä ỹ bawät nä bä. ²⁵Ti né hē taw'āāts hē hā ỹỹ. Ti hyb n'aa ỹ hapäh, badäk hahỹỹ bä ỹ awät nä, bē ỹ masa nä Kristo hā bē h'yy ka'eēh do kah'ūūm hyb n'aa, bē h'yy gadajang hyb n'aa na-āāj hē Kristo hā bē h'yy ka'eēh do hyb n'aa. ²⁶Tii bä da, p'aa hēnh bē mahang ỹ bawät bä, tak'ēp Kristo Jesus wē bē h'yy gadajang da hēp ỹ n'aa.

²⁷Hahỹ ti sahōnh hē bahānh ỹ karēn do bē hā: Ỹ karēn baad ub bē babok, Kristo ky n'aa hanām do hā bē ma kametēēk doo da. Tii d' bē aboo bä, bē wē ỹ ahōm bä, jāām hē dawēē naa ỹ ky n'aa napäh bä bē ky n'aa, baad had'yyt hē bē h'yyb tym Jesus hā ỹ bahapēē kån. Séd bē h'yyb hedoo tii b' ỹ bahapēē kån. Séd hā bē hyb n'aa tam'aah, ēr h'yy ka'eēh do Kristo ky n'aa hanām do hana do ma matēg oow rawanareem hyb n'aa. ²⁸Doo da bē jeỹỹm bē hā h'yy kawareem doo, tii b' ỹ bahapēē kån na-āāj né kä. P'op Hagä Do gawats'iik da bē wē h'yy kawereem doo, bē hā rejāā doo. Sa wē bē neỹỹm do metēēh sa hā ta tii. Bē hā kä, bē da P'op Hagä Do ed'ēēp bē neỹỹm do metēēh. P'op Hagä Do né hē ti sahōnh hē ta ti hanoo doo. ²⁹P'op Hagä Do anoo bē hā Kristo hā bē h'yy ka'eēh hyb n'aa. P'op Hagä Do anoo na-āāj hē Kristo hyb n'aa bē ahoop bē hā rarejāā doo. ³⁰Bē hā rah'yy kawereem kån hā ỹ rah'yy kawereem doo da. Ti hadoo hā ỹ kametēēh nä babä, bē ky n'aa napēē kån hỹỹ kä.

Taw'āāts hē Kristo bad'oo do paa da ji bad'oo do ky n'aa hahỹyh

2 Ti hyb n'aa kä, bē h'yyb enyyw däk do hyb n'aa Kristo hā bē h'yy kata däk do hyb n'aa, bē h'yy kanatón wät do hyb n'aa

Kristo bë takamahãn do hyb n'aa, séd bë h'yy kata däk do hyb n'aa P'op Hagä Do Sahee hä, Kristo ky enyym do hyb n'aa bë hä, bë tat'yyd mehĩn do hyb n'aa na-ããj hẽ, ²ỹ karẽn séd bë h'yyb hedo had'yyt hẽ, bë kamahãn bë da hadoo doo, séd hä bë babok, séd hä bë h'yyb padäg. Tii da bë adoo bä, baad ỹ h'yy gadajaa kãn tii bä. ³Ta wób sa bahãnh bë nu gapad'ëek hyb n'aa nado bë bad'oo sahõnh hẽ bë bad'oo doo. Bë h'yy kasabé manä bë moo bok do hä. Bë kadad'uu ta wób sa hä. Bë hyb n'aa jewyyg ta wób bë hä hẽ bë hyb n'aa jaw'yyk do bahãnh. ⁴Bë karẽn do hä had'yyt nado bë h'yyb padäg. Taw'ããts hẽ ta wób karẽn do hä na-ããj hẽ bë hyb n'aa newë.

⁵Taw'ããts hẽ Kristo Jesus h'yyb hadoo bë h'yyb:

⁶Ta Yb, P'op Hagä Do hado né paawä ti Kristo Jesus, tagadoo P'op Hagä Do tanahadoo doo, aj'yy gó takesok hyb n'aa.

⁷Sahõnh hẽ hỹ pong jé hanäng do raweh'ëeh do taberéd hõm paah.

Tii bä sa karom hado däk aj'yy tabahado däk noo gó.

⁸Aj'yy tabahado däk bä, ta daaj hẽ takadad'uu kãn. Baad P'op Hagä Do taky daheeh do hyb n'aa tagadoo radaj'ëep doo.

B'aa kajatsëk do hä tagadoo radaj'ëep, nesaa do moo heb'ooh do radej'ëep doo da.

⁹Ti hyb n'aa sahõnh hẽ sa bahãnh Kristo bahado däk P'op Hagä Do an'oo bä.

Sahõnh hẽ hyb n'aa jewyk do sa bahãnh däg Kristo P'op Hagä Do an'oo bä.

¹⁰Tii da P'op Hagä Do wén d'oo,

sahõnh hẽ hỹ pong jé habong doo,

badäk hahỹ hã habong doo,

t'õp habong do dejëp do paa na-ããj hẽ,

sa taron nu paa me rabehyy b'ëeh hyb n'aa Jesus raweh'ëeh hyb n'aa,

¹¹“Tak'ëp Hyb N'aa Jawyk Do sahõnh hẽ bag'ããs do ti Jesus Kristo”,

sahõnh hẽ rabaher'oot hyb n'aa.

Tii d' tawén hadoo, P'op Hagä Doo, Jesus Kristo Yb, kawehëe däk hyb n'aa.

¹²Ti hyb n'aa kä, najis haa, baad bë ky dahé däk do paa hadoo, heÿÿm doo me, kajajän doo me tak'ëp bë hyb n'aa tam'aah ji P'op Hagä Do edëeb wät do hyb n'aa ji moo hew'ëët do hä.^a Taw'ääts hë tii da bë bad'oo bë mahang ÿ bawäd had'yyt nado. Taw'ääts hë bë mahang ÿ nawät bä ta bahänh bë hyb n'aa tam'aah hÿÿ kä ta tii hä. ¹³P'op Hagä Do ti hanoo bë karën bë moo bok tagen'aak doo. Tanoo na-ääj hë takarën do bë bahajaa hyb n'aa.

¹⁴Taw'ääts hë bë h'yyb tsebé doo me bë moo boo sahönh hë. Bë ky n'aa jëew manäh. ¹⁵Tii d' ÿ mejüü bë hä, dooh hyb n'aa bë raky n'aa tapaa péh, baad had'op bë bahado däk hyb n'aa, P'op Hagä Do taah nesaa do nanäng do bë bahadoo hyb n'aa kä, badäk hahÿÿ bä nesaa do hedoo doo, nesaa do moo heb'ooh do mahang bë babok bä. Sagööh gadagyp doo gó wë hä bag padëek do hadoo bëeh, sa mahang, ¹⁶P'op Hagä Do wë ji edëb had'yyt do ky n'aa sa hä bë baher'oot bä. Taw'ääts hë tii da né hë bë babok, tii da né hë bë bad'oo, Kristo kajaa bä. Ý da h'yy kasab'ee, daap hë nado tak'ëp bë hyb n'aa ÿ moo wäd wät ÿ bahapäh bä kä. ¹⁷Babä ÿ ahoop do tamasaa bä P'op Hagä Do hä bë h'yy ka'eeh do hyb n'aa ta wë bë moo bok doo, tii bä ÿ h'yy gadajang, bë sii ÿ tsebé. ¹⁸Ti hyb n'aa taw'ääts hë bë h'yy gadejah, bë tsebee si ÿÿ.

Tsimoot ky n'aa hahÿÿh

¹⁹Jesus, Tak'ëp Hyb N'aa Jawyk Do hä ÿ gada, nayyw hë Tsimoot bë wë ÿ mejüü tan'oo bä. Bë wë ÿ karën ÿ mejüü, bë tah'yyb en'yym hyb n'aa, ÿ na-ääj hë ÿ h'yyb nyw däk hyb n'aa bë ky n'aa tamanaa bä. ²⁰Jääm hë Tsimoot, pa ÿ hawät doo, baad bë tahyb n'aa newëe doo, baad hadoo do bë wë karën doo. Dooh ta see pé Tsimoot hadoo doo. ²¹Ta wób jääm hë sa hä hë rahyb n'aa newëe. Sa hä baad hadoo do rahyb n'aa newëe. Dooh Jesus Kristo karën do rahyb n'aa newëe bä. ²²Tii d' nado Tsimoot. Bë hapëe däk nyy da baad ub Tsimoot bawät. Baad ub sa t'aah sa yb sii moo wät doo da Tsimoot moo wäd wät si ÿÿ Jesus ky n'aa hanäm do hä. ²³Ti hyb n'aa kä, ÿ bahapäh bä kä nyy d' hä ÿ rabad'oo, ÿ karën Tsimoot ÿ mejüü bë wë. ²⁴Ti hado né paawä, baad Tak'ëp Hyb N'aa Jawyk Do hä ÿ gada, ÿ na-ääj hë nayyw hë bë wë ÿ bahöm tan'oo bä.

^a 2.12 Heÿÿm doo me, kajajän doo me ji wén moo wät tii, ji nes'öös hyb n'aa. Masuuj nado tii. Ti hyb n'aa tii d' tawén her'oot.

Epaperodit ky n'aa hahÿÿh

²⁵ÿ hyb n'aa newë däk, taw'ääts hē hāj ÿ hadoo do Epaporodit häd näng doo, ÿ tamasa hyb n'aa wē ÿ bē mejüü do paah, tababaaj hōm bē wē. Warahén rabad'oo doo da, si ÿÿ ti tamo n'aa jesuu panyyg hanäm doo. ²⁶Bē wē ÿ mejüü tababaaj hōm tak'öp sahōnh hē bē tahyb n'aa esee do hyb n'aa. Tahyb n'aa tón, nahëë näng paa bē ky n'aa napëë däk do hyb n'aa. ²⁷Te hub né hē. Nahëë näng né paah. P'eets hē paawä tadajöp. Tawén nadajöp P'op Hagä Do t'yyd mehīn ta hä. ÿ na-ääj hē P'op Hagä Do t'yyd mehīn, ÿ h'yy kanatón hyb n'aa ta bahānh tadajöp bā paawä. ²⁸Ti hyb n'aa kã, nayyw hē ÿ mejüü bē wē tababaaj hōm, bē bahapäh bā kã bē h'yy gadajang hyb n'aa. Tii bā da, bē h'yy gadeja kän do hyb n'aa da, dooh da tak'öp ÿ hyb n'aa tón wäd bā. ²⁹Taw'ääts hē h'yy gadajaa gó bē gadoo da, ji hÿÿj Tak'öp Hyb N'aa Jawyk Do hä h'yy kata däk do ji gadoo doo da. Taw'ääts hē bē weh'ëeh ta ti hedoo doo, ³⁰p'eets hē paawä tadajöp do hyb n'aa Kristo wē tamoo wät do hyb n'aa. ÿ tamasa bē jawén buuj bē nahajaa do hyb n'aa ÿ bē masaa bā. Tahapëë né paawä dajöp ta hä péh, ti hadoo né hē ÿ tamasa.

Dooh ji daab yb bā ji daaj hē ji hajaa do hä ky n'aa hahÿÿh

3 Hÿÿ kã wakän haa, ta see ky n'aa bē ÿ ma erih: Taw'ääts hē bē h'yy gadeja Tak'öp Hyb N'aa Jawyk Do hä bē h'yy kata däk do hyb n'aa! Dooh ÿ h'yy ganapō däg bā p'aa hēnh ÿ erii bā pooj jé bē ÿ maher'ood wät doo. Baad ti bē hä, bē ÿ ma erih do bē tamo n'aa jesuu do hyb n'aa, ta see da bē rama met'ëëg mahānh.

²Bē hyb n'aa matakä ajyy nesaa do moo bok doo, awaar nesaa do hedoo doo, ji hub kekyyt doo,^b bē rawad'ii mahānh. ³Ër ti P'op Hagä Do karapee heh'äät doo. Dooh sa masuuj noo byyh kahök do hä daap yyp do rado bā ti P'op Hagä Do karapee heh'äät doo. Ëër, ta Sahee h'yyb mahüüm do hyb n'aa P'op Hagä Do hyb n'aa jew'yyk doo, Kristo Jesus hä kasab'ee doo, èr ti P'op Hagä Do karapee heh'äät doo. Ër ti ta karapee heh'äät doo, ji hä hē ji moo wät do hä, ji daaj hē ji hajaa do hä na-ääj hē daab nayyp doo. ⁴ÿ haja né paawä ÿ daab yb bā ji daaj hē ji hajaa do hä. Sa daaj hē

^b 3.2 Ma matëg oow Paw-Ro pes'ääp. Ji hub rakekyyt tawén her'ood bā, ajyy Judah buuj nadoo do Jesus hä h'yy ka'eeh do hä raky kah'üüm, sa masuuj noo byyh ragehök hyb n'aa Judah buuj rabahed'oo doo da. Jääm hē tii da P'op Hagä Do gadoo ji, sa hä. Dooh se hub rado bā. Daap ti rama metëëk doo. Ti hyb n'aa Paw-Ro mejüü rahyb n'aa matakëë sa mahānh.

rahajaa do hã radaab yyp rahajaa redoo bã, ÿ sa bahãnh ÿ hajaa ta tii hã ÿ daab yb bã ÿ karën bã paawã. ⁵Masuj ÿ noo byyh ragahög hõm 8 ta ãh ÿ bahadoo bã kã. ^cIsaraéw buuj ÿÿh. Bën-Jamih panaa ÿÿh. Eber buuj heh'ãät né ÿÿh. Pariséw see né ÿÿh, baad Mosees ky n'aa jaw'yik do ky dah'eeh doo. ⁶Tak'ëp ÿ karën do hyb n'aa Mosees ky n'aa jaw'yik do sahõnh hẽ raky daheeh, ÿ rejãã paa Jesus hã h'yy ka'eeh doo. ^dDooh raw'yyt pé hã ÿÿ ÿ raky n'aa tapaa péh, baad ÿ ky daheeh do hyb n'aa paa sahõnh hẽ Mosees ky n'aa jaw'yik doo. Baad däg ÿÿ Mosees ky n'aa jaw'yik do matym gó.

⁷Ti hadoo né hẽ, sahõnh hẽ tii, ti noo gó ÿ kamahãn doo, dooh wäd ti hã ÿ hÿÿ kã Kristo ÿ bahapëë däk do hyb n'aa. ⁸Ti had'yyt nado, sahõnh hẽ né hẽ p'ooj ub ÿ daab yyp doo, dooh its hã ÿ hÿÿ kã Kristo Jesus, wahë ÿ n'aa, ÿ hapëë däg kãn do hyb n'aa. Sahõnh hẽ bahãnh né hẽ ti Kristo ji bahapäh doo. Kristo hyb n'aa ÿ eréd hõm sahõnh hẽ pooj jé ÿ kamahãn doo. Hesus do ji aw'oong hõm do hadoo sahõnh hẽ ti hã ÿÿ, Kristo baad ÿ bahapäh hyb n'aa da, ⁹ta hã ÿ h'yy kata däk hyb n'aa. Ta hã ÿ h'yy kata däk do hyb n'aa kã, dooh ÿ tyw n'aa esóts wäd bã Mosees ky n'aa jaw'yik do ÿ ky daheeh do hyb n'aa baad ÿ bahado däk P'op Hagã Do matym gó. Baad ÿ hado däk hÿÿ kã P'op Hagã Do matym gó, Kristo hã ÿ h'yy kae däk do hyb n'aa. P'op Hagã Do hanaa né hẽ ti baad ji hado däk do ta matym gó. Ji h'yy ka'eeh do hyb n'aa né hẽ tii. ¹⁰Baad ÿ karën Kristo ÿ bahapäh. Hahÿÿ da ti ÿ karën: ÿ karën ÿ bahapäh hã ÿÿ hẽ ta hejój taganá wät noo gó tagadoo doo. ÿ karën ÿ bahapäh hã ÿÿ hẽ Kristo ahoop doo. ÿ karën ÿ bahapäh hã ÿÿ hẽ tadajëp doo. Kristo dajëp paa ër hyb n'aa, ti hyb n'aa ÿ radajëëb bã ta hyb n'aa, ÿ karën ÿ gadoo né ti na-ããj hẽ. ¹¹Sahõnh hẽ ta ti ÿ karën ÿ bahapäh hã ÿÿ hẽ, ta jawén ÿ P'op Hagã Do gan'yih hyb n'aa dejëp do mahang.

Ji pooj jé hawät do hã tak'ëp ji hyb n'aa matakëë do ky n'aa hahÿÿh

¹²Dooh baad Kristo hadoo ÿ hado nã bã. Dooh baad had'op do ÿ hado nã bã. Ti hadoo né hẽ, tak'ëp ÿ hyb n'aa tam'aah Kristo Jesus hadoo ÿ bahado däk hyb n'aa kã. Ti hyb n'aa ÿ tabasëëw hõm.

¹³Wakãn haa hedoo do Kristo hã h'yy ka'eeh doo, hã ÿÿ, dooh ta ti

^c **3.5** Tii d' né paa Isaraéw buuj rabahed'oo P'op Hagã Do karapee see karapee t'aaah tabahadoo hyb n'aa. Tii d' né paa P'op Hagã Do mejüü sa hã.

^d **3.6** Tii d' Paw-Ro d'oo paah, Mosees ky n'aa jaw'yik do Jesus hã h'yy ka'eeh do ragawats'iik rakarën ted'oo do hyb n'aa ti noo gó.

ÿ haja nä bã. Dooh baad Kristo hadoo ÿ hado nä bã. Ti hadoo né hẽ, tsyym kas'ÿÿ do rabahed'oo doo da ÿ badoo had'yyt hẽ. Dooh ÿ hyb n'aa matakã bã jó ÿ hadãk hẽnh. Dooh ÿ hyb n'aa newẽ bã pooj jé ÿ bawãt do hã, ÿ hanãng péh. Pój ÿÿ jé hawãt do hã tak'ëp ÿ hyb n'aa matakëë. ¹⁴Tak'ëp ÿ hyb n'aa tam'aah ta sãm ÿ gadoo hyb n'aa P'op Hagã Do hanaa. Hahÿ ta sãm ÿ gadoo hyb n'aa ÿ tawén naëëj wãt doo: Hÿ pong jé ÿ d' bawãd had'yyt hẽ Kristo Jesus hyb n'aa.

¹⁵Ti hyb n'aa, sahõnh hẽ ëër, baad Jesus hã h'yy kae dãk do hedoo doo, ÿ hyb n'aa newëë doo da, nag'aap hẽ ÿ erii wãt doo da taw'ããts hẽ ër hyb n'aa newẽ. Ta see hadoo bë hyb n'aa newẽ nä bã ÿ erii wãt do hã, tii bã da, P'op Hagã Do metëëh da bë hã, baad né ti ÿ erii wãt doo. ¹⁶Ti hado né paawã, taw'ããts hẽ ër ky daheeh ër hã P'op Hagã Do metã wãt do pénh né hẽ.

¹⁷Taw'ããts hẽ ÿ bawãt doo da séd gó bë babok, wakãn haa hedoo doo. Taw'ããts hẽ bë hyb n'aa matakã ãã babok doo da habok do sa hã, rababok doo da bë na-ããj hẽ bë babok hyb n'aa. ¹⁸Baad habok do hã bë hyb n'aa matakã ÿ wén nãng, hajõk ti anãng b'aa kajatsëk do hã Kristo dajëp do ky n'aa majiũ rababok doo da habok doo, Kristo hã rah'yy ka'eeh sa noo né paawã. Hajõõ nuu me bë ÿ maher'ood wãt tii. H'yy kameoot doo me ÿ ab'aanh tii. ¹⁹P'op Hagã Do gawats'iik da tii. Rawa do hã, rawëh do hã, reëëk do hã, ta see rakarën do hã rah'yyb padãg had'yyt hẽ, P'op Hagã Do hã nado. Nu meby n'aa nãng do hã rah'yy kasab'ee. Badãk hahÿÿ hã hanãng do hã rah'yyb padëëk. ²⁰Ta ti hedoo do rababok doo da bë aboo manãh. Hÿ pong jé babuuj ti ëër. Tii b' naa, hÿ pong jé naa tabahyng, baad ër gada Jesus Kristo, Tak'ëp Hyb N'aa Jawyk Doo, ër h'yyb tym dëëb. ²¹Ta hejój me sahõnh hẽ tabag'ããs. Ta ti tahejooj me ër hub nahejooñh do tawareem da, ta hub kabaj'aa do hadoo ër hub bahadoo hyb n'aa kã.

4 Ti hyb n'aa, wakãn haa hedoo do ÿ kamahãñ doo, tak'ëp ÿ hyb n'aa esee doo, baad bë aboo had'yyt hẽ bë ÿ maher'ood wãt doo da né hẽ. Bë h'yy keréd manã Tak'ëp Hyb N'aa Jawyk Do hã. Najis haa, bë hyb n'aa né hẽ ÿ h'yy gadajang. Bë hyb n'aa né da ÿ kawehëë dãk.

Sa hã Paw-Ro maher'oot do ky n'aa hahÿÿh

²Tak'ëp ÿ betsëë ÿÿnh Ewodija hãd enãh doo, ÿÿnh Sãn-Tike hãd nãng do daheeh, séd rah'yyb hedoo hyb n'aa Tak'ëp Hyb N'aa

Jawyky Do hã rah'yky kata dãk do hyb n'aa. ³Õm, baad si ÿ Kristo wẽ moo wãt doo, ÿ etsẽẽ a hã ta ti ÿÿj mamasaa, sãd rah'ybyb hedo padẽek hyb n'aa p'aa hẽnh. Si ÿÿ tak'ẽp rahyb n'aa tam'aah paa Jesus ky n'aa hanãm do ãã her'ood hõm hyb n'aa. Aj'yky Keremen hãd nãng do sii, ta wób sa sii na-ããj hẽ, hawãd had'yty do gadoo do heen n'aa hã sa hãd kerii dãk do sa sii ãã paa ramasa ta ti ÿÿj.

⁴Taw'ããts hẽ bẽ h'yky gadejah, Tak'ẽp Hyb N'aa Jawyky Do hã bẽ h'yky kata dãk do hyb n'aa. P'aa hẽnh bẽ ÿ maher'oot: Bẽ h'yky gadejah. ⁵Taw'ããts hẽ kaja hẽ denaa hẽ bẽ h'ybyb bẽ mahũm sahõnh hẽ sa wẽ, ta tii da bẽ babok sahõnh hẽ rabahapãh hyb n'aa. Edaa dãk Tak'ẽp Hyb N'aa Jawyky Do matẽeh doo. ⁶Taw'ããts hẽ dooh bẽ hyb n'aa tón pẽh. Bẽ er'ood had'yty bã P'op Hagã Do sii, bẽ ky n'aa ets'ẽẽ ta hã bẽ karẽn doo. Bẽ j'aa etsẽ na-ããj hẽ ta hã sahõnh hẽ bẽ hã tabanoo do hyb n'aa. ⁷Tii bã da P'op Hagã Do hã hana do ji h'ybyb n'yym doo, sahõnh hẽ ji hajaa do bahãnh hadoo do mo n'aa jesuu da bẽ h'ybyb, bẽ h'yky kanatón hyb n'aa kã Kristo Jesus hã bẽ h'yky kata dãk do hyb n'aa.

⁸Tagadẽeg ub, wakãn haa hedoo doo, sahõnh hẽ baad hadoo do hã bẽ h'ybyb padãg. Sahõnh hẽ ji weh'ẽeh do hã, sahõnh hẽ P'op Hagã Do matym gó te hub hedoo do hã bẽ h'ybyb padãg. Sahõnh hẽ nesaa do nanãng do hã, sahõnh hẽ hanãm do hã bẽ h'ybyb padãg. Sahõnh hẽ baad tabahadoo do hyb n'aa ky n'aa etsẽeh do hã na-ããj hẽ bẽ h'ybyb padãg. Baad had'op do hã, baad tabahadoo do hyb n'aa ji j'aa etsẽ do hã bẽ h'ybyb padãg na-ããj hẽ. ⁹Bẽ ÿ ma metẽek doo da, hã ÿ naa bẽ gado dãk doo da na-ããj hẽ bẽ aboo. Hã ÿ naa bẽ maa napãh doo da, wẽ ÿ bẽ bahapãh doo da na-ããj hẽ bẽ aboo. Tii bã da ji h'ybyb nãw P'op Hagã Do hã hana do bẽ hã tabawãt da.

Ramasa do hyb n'aa Paw-Ro h'yky gadajang do ky n'aa hahÿh

¹⁰Tak'ẽp ÿ h'yky gadajang Tak'ẽp Hyb N'aa Jawyky Do hã, hÿÿ kã, bãp peej tabado dãk bã kã, p'aa hẽnh ÿ bẽ hyb n'aa es'ee wãt do hyb n'aa, ÿ bẽ masa. Pooj jé ÿ bẽ hyb n'aa es'ee wãd né paawã, dooh ta tyw n'aa pé ÿ bẽ masa hyb n'aa paah. ¹¹Dooh ta ti ÿ erii bã wẽ ÿ badoh do hyb n'aa. Dooh. ÿ h'yky gadajaa kãn sahõnh hẽ hã ÿ kametẽeh do hã, baad tabadoo bã, baad tanado bã na-ããj hẽ. ¹²ÿ hapẽẽ dãg kãn nyy d' ÿ bad'oo wẽ ÿ badoh bã, wẽ ÿ tamad'aak bã na-ããj hẽ. ÿ haja dãk ÿ h'yky gadajang sahõnh hẽ wẽ ÿ kametẽeh do hã, ÿ wog nyy bã, ÿ asa bã na-ããj hẽ, sahõnh hẽ ji karẽn do

wë ÿ tanyy bä, wë ÿ badoh bä na-ääj hë. ¹³Sahõnh hë ÿ hajaa Kristo ÿ tah'yib hej'oonh do hyb n'aa.

¹⁴Ti hadoo né hë, taw'ääts hë né hë ÿ bë masaa wät tabahejoonh bä hä ÿÿ. ¹⁵Bëeh, Pirip panang buuj, bë hapäh né hë, papuuj nä Jesus ky n'aa hanäm do bë gado däk noo gó, hëej Masedonija häd näng do ÿ beréd hõm noo gó, jããm hë bë ti Jesus hä h'yy ka'eeh do wób mahang, ÿ masa doo, ta s'ee hënh Jesus ky n'aa ÿ ma metëek hyb n'aa bë mahang ÿ ma met'ëeg wät doo da. ¹⁶Tesaronika panang bä ÿ bawät noo gó, pawóp nuu me bë mejõ wät paa matym ÿ n'aa ÿ bë masa hyb n'aa wë ÿ badoh do hyb n'aa. ¹⁷Dooh hahÿ ÿ erii bä p'aa hënh matym ÿ n'aa bë mejüü hyb n'aa. Dooh ti hyb n'aa tado bä hahÿ ÿ erih doo. ÿ karën baad bë P'op Hagä Do ky n'aa edëng ÿ bë masa do hyb n'aa. ¹⁸ÿ gado däk sahõnh hë wë ÿ bë mejõ wät doo. ÿ gahëen do bahãnh ti ta tii. Ta bahãnh wë ÿ ti anyy däk hÿÿ kä wë ÿ bë mejõ hõm do an'oo bä, Epaporodit tajooh doo. P'op Hagä Do h'yy gadajang bë masa do hä. P'op Hagä Do matym n'aa buu benyym do hadoo, P'op Hagä Do gadoo do hadoo tii.^e ¹⁹P'op Hagä Do ÿ h'yy kaha'eeh doo, Kristo Jesus hyb n'aa bë hä da tabanoo sahõnh hë bë wë badoh doo, bë h'yyb gó badoh do na-ääj hë. Tak'ëp hetsooh do ta wë hanäng do pénh né bë hä d' tabanoo.

²⁰Taw'ääts hë P'op Hagä Do er h'yy kaha'eeh do hä, er Yb, er j'aa etsëe had'yyt hë. ÿÿ. Tii d' né hë. Taw'ääts hë.

Sa hä takedëe hõm do ky n'aa hahÿÿh

²¹Taw'ääts hë bë edëe sahõnh hë Kristo Jesus hyb n'aa tsyt hë P'op Hagä Do wë kasëew padëek doo. Èr hÿÿj hedoo do babä pa ÿ habong do bë m' rahyb n'aa esee. ²²Sahõnh hë tsyt hë P'op Hagä Do wë kasëew bong do hahÿ panang bä habong do bë m' rahyb n'aa esee na-ääj hë. Roma sa wahë n'aa Sesa ramaneëenh do wë moo b'ook doo, Jesus hä h'yy ka'eeh doo, baad bë m' rahyb n'aa esee.

²³ÿ karën Jesus Kristo, Tak'ëp Hyb N'aa Jawyik Doo, ky enyym bë hä. Jããm hë kä.

^e 4.18 P'ooj ub, buu benyym do Isaraéw buuj rama ejuu P'op Hagä Do raj'aa etsë hyb n'aa. Tii da takerii däk Esodo hä. Ta ti ky n'aa gó Paw-Ro beh'üüm.